

վում է այդ բերդում արաբական վոստիկան Բշրի կողմից, բայց նա դուրս է գալիս ամրոցից, հարձակվում թշնամու վերա և փախցնում Դվին: Յերկու տարի հետո միայն վոստիկանը տեր է դառնում ամրոցին՝ հայ գորականների թողնելու հետևանքով*:

Բերդի տակն է, արևմտահարավային կողմից, Ղալաղիպի (Բերդատակ) թուրքական փոքրիկ գյուղը. նորանից հարավ յեղած պուրակներով ծածկված ձորակը ձգվում է դեպի փոքր Ախ--Դաղի փեշերը**.

այստեղ, ինչպես և դեպի բերդը տանող ձորակի բերնում, գտնվում են մի մի ձգնարան՝ խցիկներ, առանց վոր և ե արձանագրության: Գետակի ափին, ձորագոգում գտնվում է մի հին գյուղատեղ աների ավերակներով. ուշագրության արժանի է, մի վիմափոր, բավական մեծ սենյակ, վեմքարով. կողքին մի ուրիշ փոքրը. նորա գլխին յերկու ուրիշ վիմափոր սենյակներ, հարավային կողմը պատշգամբի տեղով. յերևում են գերանների փոսերի տեղը:

Բայց Սաղբակյանց իշխանության սահմանները ձգվում էյին ավելի դեպի արևելք Գեղարքունյաց գավառի միջին մասերը, մինչև ներկա Վերին Ղարանլուխ

գյուղի մոտերքը, վոր մի խաչքարի 1220 թ. արձանագրությամբ Վասակի և յուր Բաբաբը! վորդու իշխանության մեջն էր¹:

Ամփոփելով մեր ուսումնասիրությունը Սաղբակյանների իշխանության սահմանների մասին, տեսնում ենք, վոր նա մի ամբողջություն չէր կազմում, այլ բազկացած էր մի քանի մեծ ու փոքր մասերից. ամենից ընդարձակ մասը Շահապունիքն էր Ճահուկի արևելյան բաժնի և Վայոց ձորի սահմանակից մասերի հետ, Ճահուկ և Շահապունք գետակների խառնուրդից մինչև Բարկուշատ և Արփա գետերը. վերջինի հետ միացման կետեր էյին կազմում Մարտիրոսի, Ջուլի, գուցե և Քիշնի վտակները: Թեական պիտի համարել արևմտյան Ճահուկը և Երնջակի սահմանակից մասը Ապրակունյաց վանքով: Ամբողջական մասեր էյին Սրկղունյաց վտակի հովիտը Վայոց ձորում և Քեղվա ձորը Այրի կամ Գեղարդի վանքի հետ Ազատ գետի հովտում: Ի՞նչ ընդարձակություն ուներ Սաղբակյանց բաժինը Կեչառույքի կամ Ծաղկեձորի վանքով, վորոշել չենք կարող: Իշխանության սահմանների և կեղբոսների մասին պարզ գաղափար է տալիս վերջում գետեղած քարտեղը:

Դ,

ՎԱՍԱԿ ԽԱՂԲԱԿՅԱՆ ՅԵՎ ՅՈՒՐ ՅԵՂԲԱՅՐՆԵՐԸ.

Նախընթաց գլխի մեջ տեսանք, թե Պոռչյանց իշխանությունը պետք է հաստատված լինի վոչ վաղ քան 1201 թիվը և վոչ ուշ քան 1214, յերբ Վասակ իբրև նոր իշխանության գլուխ սկսում է շինարարությամբ զբաղվել, բայց ամենայն հավանականությամբ 1201—1210 թ.թ. մեջ: Նորա կյանքի մասին մանրամասնություններ չգիտենք, բայց հայ պատմիչների համառոտ բնորոշումները բավական են համոզելու, վոր ԺԳ. դարու առաջին քառորդի նշանավոր դեմքերից մեկը պետք է յեղած լինի. Գանձակեցին² նորան անվանում է «Վասակ քաջ». Որբելյանը պատմելով Իվանե աթաբեկի և Գեորգի Լաշայի ձեռքով նորա կողմնակալ նշանակվելու դեպքը, անվանում է նորան «ամենօրհնեալ Վասակ Սաչենեցի», «որ և մեծաջան վաստակօք բազումս նահատակեալ ի վերայ քրիստոնէից և եկեղեցեաց, օրհնեցաւ եւ գովեցաւ յամենայն աշխարհաց, որոյ յիշատակն օրհնութեամբ եղիցի յայսրմհետէ մինչև յաւիտեան»³: Այրիվանեցու բնորո-

շումը տեսանք վերև, վոր հորն ու վորդիներին հավասարապես վորակում է վորպես թշնամիների դեմ «քաջ» և քրիստոնյաների համար «բարի» անձինք:

Գրական այս տեղեկությունների վերա ավելանում են արձանագրությունները, վորոնք պատերազմական գործերի մեջ ցույց տված հաջողությունների հետ՝ մատնանշում են նաև նորա շինարար ու գեղասեր վուզին. դոցանից մեկը գտնվում է Եղեգյաց ձորի Արատեսի վանքում⁴, վոր թեև հայտնի էր առաջուց, բայց առանց թվականի, այն ինչ գրված է ՈԿԳ (=1214) թվականին, միայն փոքր ինչ կողքից, ուստի և վնչ Ջալալյանի և վնչ Քաջբերունու, ինչպես և բնականապես նրանց հետևող Ալիշանի կողմից նկատված (պատկեր 3. Հավել. 3): Արձանագրությունը գրված է Վասակ Սաղբակյանի բերանից և թվագրված «ի թագաւորութեան Վրաց Լաշայն եւ յաշխարհակալութե Իւանէի աթաբակի». և «ի հայրապետութե ար Սարգսի»⁵. Վասակն իրեն անվանում է «որդի Սաղբակայ», հիշում է յուր իշխանության սահմանները՝ «կողմնապահ ի Գառ-

* Յովհ. կաթ. Ղուկասեան մատենադարան. Թիֆլիս. 1912. յեր. 356/7:
 ** Տեղական թուրքերը կոչում են Դավա - Բոյուն:
 1 Ազգ. Հանդ. XVIII. 152:
 2 Ղուկասեան մատենադարան. Թիֆլիս. 1909. 194:
 3 Ղուկասեան մատենադարան. Թիֆլիս 1910. 397:

4 Ջալալեան. Բ. 157. Քաջբերունի. «Արարատ» 1888. 769: Ալիշան. Սիսական եր. 143:
 5 Այս տէր Սարգսիք նորավանից եպիսկոպոսն է, Սիւնեաց տէր Ստեփանոսի յաջորդը 1216 թուից սկսած. Օրբելեան. 352: